

NZILA YALUKISIZE

MULIMU YA LIZAZI LEE



. . . fa nako nyana fela halunze luinamisa litoho zaluna.

Ndata luna yakwa Lihalimu, Lu itumela ku Wena ka Jesu Kreste, ka lisepiso za Hae zetuna Za lu file. Lwa itumela ku Wena ka lika ze kaufela. Lu mwatasa tibeledo yetuna mo mwa muleleñi mwahala Bakreste babande baa. Lu Mu kulubela kuli azamaye mwahala luna ku boniza kubateni kwa Hae, kufa sicaba tumelo, ku ba susumeza kuli ba lumele. wo kona mulelo wa luna ka kuba mo, Ndate. Lu ziba kuli lwakona ku Ku sepa. Haluna ku swabiswa. Kakuli lu kupa zeo ka Libizo la Hae. Amen.

Mwa kona kuina.

Ne ni tabezi hahulu kakusasana kacenu ka kuba ni mukushuko wo ni sikwata sesinde se sa bakutazi mo mwa muleneñi. Mi kacwalo luna. . . Ni sepa kuli—kuli mizwale ba itepiñile haiba kuna ni ya ka ibata. Nako ye cwalo ya ku kopana yene lunani. Mi cwale, busihu bo ki busihu bwaluna bwa bubeli, inge luya cwalo mwa nzila. Kuli cwale, lu sepa kuli Mulena uka mi fuyola hahulu ni kufita.

Ni lumela Ni sweli kotalima mulikana ka yomunde, musala Bo. Upshaw, yainezi fa, Kezeli Upshaw. Mulena aku fuyole. Ni hupula Muzwale Willie Upshaw. Ne ni amuhezi liñolo zazi leliñwi ni siswaniso sa Muzwale Willie, Muyemeli mwandu ya milao. Kacwalo, na—na bile sihole ka lilimo ze sikisite-sikisi.

Na li mwa mukopano nako yeñwi busihu, na bona pono ya hae, inge ainzi, inza zamaya mwa sicaba, ni suti ya hae, inza obami fafasi. Nabile mwa wiucheya ni milamu, sina kaufela ha ne mu mu ziba, mi Mulena Jesu a mu folisa ona busihu bo bu swana bwani. Mi na bulukile tumelo kufitela a timela.

Lu ikutwa ku bubekwa, busihu bo, kuli mbelwa wa hae abe mo inza inzi. Nana ni myaha yemikai nako ya i lo bona Mulena? Na kuma kai? [Kezeli Upshaw wa alaba—Mu.] Na pilile kufita fa myaha ye eite-sikisi ya kupepwa. [Kezeli Upshaw upaka za lifu la hae.] Aya kwa Lihalimu ku yo ba ni. . . Lu tumuezi ka baana babatuna, lindwalume zetuna za tumelo.

Cwale, busihu bo, ki, ha lu lati ku mi buluka nako yetelele. Ne lu mi bulukile mizuzu yelishumi kufitelela nako maabani manzibwana, mizuzu ye mashumi amabeli kuli ibe teni. Lu zwanga hañata ka naini-seti. Ni ka lika ku akufa kwateni busihu boo. Ni bile. . . Ni cincize kuzwa kwa mañusa aka a bupolofita o Ni bile ni kutaza mwa libaka zeshutana za naha, kutaha kwa

lisebelezo za bulumiwa hape. Mi fa mañusa a bupulofita ani, lu ka abeya fela ona cwalo inge lu zwelapili ni kuzwelapili. Mi cwale kuli lu li pumele, ku tata, mi sa cincanga bu—bu bulumiwa bwatani kaufela.

Mi libaka le ni ezeza cwana: kakuli zazi leliñwi, ha ne ni zwa kwa Canada, fahalimu fela fa mwa Montana, kakusasana luli, Mulena Jesu. . . Ni ziba si utwahala bunca, kono Ne ni pahami mwa mota, mi sesiñwi sa ebelisa ngana yaka. Na utwa Linzwi, le liutwahala sina mo mu ni utwela, lali, “Libizo la hao li ñozwi fa lilundu lani.” Mi Na talima, mi ha lu yo yema, Billy ni Na, Mulena Jesu ali, “Kuta ona fa cwale, mi ukale kuhasanya evangeli sina mo no ezeza sapili.”

Kona Hani tile kwanu busihu boo, bakeñisa kukuta hape ku to lapelela bakuli. Kuna ni likande le li telele kuzona, mi Ni ziba kuli mina sicaba sa matepu kwanu, mina muteelezanga matepu a luna, mwa ziba likande leo. Nitezi ku to lapelela bakuli mo hape. Kuna ni limpo zeñata hahulu ku Mulimu. Mulimu wakona kuitusisa ifi kaufela ya zona Ya tabela haiba lu ka Mu lumeleza fela kueza cwalo. Yena ki yena Mulena Mulimu.

Mi cwale, Ni lika kuli ni si ke. . . na palelwa kubeya mazoho fa bakuli haiba Ni kona ku ikambusa zona, kakuli, fo, ku bonahala inge (zeo li lukile), kono ku bonahala inge mutu yomuñwi uka foliswa, ba li, “Kihande, wa *Kuli-ni-kuli* na ni beile mazoho.” Mwabona? Na—Na lata ku mibona mu beya mazoho ku Yena, ku Kreste.

Musebezi waka ki kuli, kaufela lwa ziba ka Mañolo, yona foliso ya Bumulimu yani ibulukilwe kale ku mulumeli. Ki siemba—ki siemba sa manyando a Jesu: “Na holofalezi bumaswe bwa luna, ka miupa ya Hae lu folisizwe. sina Mushe mwa na pahekezi noha ya kopa mwa lihalaupa, ni yena Mwana mutu uswanezi ku pahekwa cwalo.” Ki mayemo a swana.

Mi wani neli ona mufuta, Kreste ki mufuta o muñwi. Mi cwale haiba—haiba swalelo ya kale neitisa folisa, ku kaba cwani ku yenca, ye na ni lika zende, zetisa foliso ya Bumulimu.

Cwale, Jesu na pahekilwe ka libaka leliswana leo noha ya sipi ne i pahekezwi (Na ezizwe sibi): kakuli, noha ne i zizwe ka sipi ya kopa, mi *kopa* ki “sisupo sa katulo ye pahami”; mi *noha*, kubonisa “sikuto sa noha” kuzwa kwa simu ya Edeni, koo sibi ni butuku ne li keni.

Mi Jesu hakoni. . . Hakuna mutu ya kona ku kutaza Jesu Kreste kuba swalelo kusina kukutaza za foliso ya Bumulimu. Hakuna mutu yakona ku kutaza Evangeli kusina kukutaza foliso ya Bumulimu. Kakuli, mwabona, ha mu lukeli. . . nakaba ni. . . ha lukeli kuba ni lika zeñwi. Kuswana sina folofolo ha i ku sweli, ha mu lukeli fela ku i puma lihutu, kamba kuipuma kwatani lizoho—lizoho la yona kamba kaufela se sili bukaufi ni wena. Ku i bulaya fela kwa toho fo he kipeto u i konile.

Mi cwalo kona mwa na ezelize Jesu ha Na—ha Na shwezi sibi: Na bulaile lika kaufela ze ne tahile ka sibi, A lu liulula ka kufelelela. Luna cwale lunga ma—ma masheleñi aluna ku zetuna zaluna. . . swalele ya masheleñi aluna a tukuluho yetezi fa kutaha kwa Hae hape.

Kacwalo, mwa bona, butuku kaniti bu—bu tisiwa ki sibi. Yomuñwi na ezize sibi. Nekusina matuku konji ha kutaha sibi. Mi cwale sibi ha si taha, matuku a latelela. Butuku ki taba ye tiswa ki sibi. Mi cwale, ha Na bulaile sibi, a si felisa milelo kaufela ya sona. Mwabona, nelina ni kuba cwalo.

Cwale, lu ka bala busihu boo siemba sa Mañolo nyana.

Ni tabile hahulu kuba, kwa mulaho wa ka mo busihu cwana, sikwata sa mizwale yaka sesinde sene sili mwa mukopano wani kakusasana cwana, ni kufumana, kubona Muzwale Shakarian kwa mulaho kwani, nibona, ni balikani baka babañata, buñata bwa bona. Ki tabo luli kuba ni mina mizwale mo busihu cwana. Mu ni lapelele cwale, haiba mwa lata.

Cwale, ha lu apuleñi mwa Mañolo, ka palo nyana fela, haiba Mulena alata.

² Mi muhupule, kamuso busihu, za kulapelela bakuli hape. Mi cwale ha Ni bulela. . . Muteeleze, mañi ni mañi ulika kueza se, musike mwa libelela sika kaufela ku ezahala. Taba ye mulukela kueza, ki kulumela Mulimu ona fa cwale. Mu Mu lumele onafa cwale! Mwabona?

³ Cwale se kubile mifuta kaufela ya bulumiwa. Mulimu, mwa mazazi a maungulo aa, Ni lumela kuli, u lufile lika kaufela Za nani mwa Buka ya Hae. Lika kaufela za Na sepisize, lu liboni, mi niteñi ku bonahala kuli batu habakoni ku li lemuha. Haili baba lukiselizwe ku li lemuha, ba ka li lemuha; konji ona bao fela. Li fofuza alimuñwi; li kwalula meto a yomuñwi.

⁴ Muhupule, lu lumela kuli Jesu Krete ki ya swana maabani, kacenu, ni kuyakuile. Ha si ka shwa, kono wa pila kuyakuile. Mi Uteni mo busihu boo. Lu fapila Kubateni kwa Hae, busihu boo, mi Uteni mo inza paka ni kueza sepiso kaufela ya Na file mwa lizazi lee kuba yende. Mi ki Ya swana maabani, kacenu, ni kuyakuile. Kacwalo, sika kaufela sa Nali sona, U cwalo, busihu boo. Kacwalo ha lu Mu lumeleñi cwale, halunze lubala Linzwi la Hae ni kubulela ka Yena, ka mizuzu yetatama ye lishumi ni yeketalizoho, mizuzu ye mashumi amabeli.

⁵ Genese, kauhanyo ya 22, ni timana ya 7 ni 8, ka nzila ya kuba ni tuto.

Mi Isaka abulela ku Abrahamama ndatahe, mi ali, Ndate: mi yena ali, Ki na Yo, mwana ka. Mi ali, Bona mulilo ni likota ki ze: kono ngu ya sitabelo sa- kucisa i kai?

Mi Abrahamama ali, Mwana ka, Mulimu uka iponela ngunyana ya sitabelo: kacwalo baya bababeli cwalo hamoho.

⁶ Mulena Jesu, fuyola Linzwi la Hao, Lisike la kuta mukungulu fela, kono cwale lipeu liwele fa mubu o ka tisa puluso ku ba baba tokwile, sibeli sa za nama ni za moya. Lu i paku Wena; kopano, sicaba, Linzwi, palo, tuto. Mi cwale Moya o Kenile u buse butu bwa luna, kuli lubone Jesu Kreste. Amen.

⁷ Ni bata kubulela fa mizuzu yelikani fela fa tuto yeli: *Nzila Yalukisize Mulimu Ya Lizazi Lee.*

⁸ Mulimu kamita ubile aba ni nzila. Kuna ni linzila zepeli, zeo ki, linzila za luna kamba linzila za Hae. Mulimu una ni nzila ya kacenu, kakuli U lukisize kale nzila ya lika kaufela. Mulimu, kwa simuluho, na zibile mafelelezo, kacwalo U beile Mañolo a Hae mwa lusika ni kaufela. Mi lusika lwani, ha lu taha . . . Cwale musike mwa palelwa kubona se. Lusika loo, ha lu taha ni lona, hañata bulumiwa bu ka lyangana mwa milao lao, ni zeñwi cwalo, ni lizo, kufitela liba kwahule hule ni Linzwi.

⁹ Mi kipeto Mulimu kamita ulumela mutu mwa sibaka, mupolofita. Mi mupolofita yo . . . Mulimu ha cinci mulao wa Hae. Ha cincangi linzila za Hae. Yena kamita u li ezanga ka nzila yeswana. Kamita una ni kuezwa cwalo; Uswanela ku eza ona cwalo ka nako ye. Mi, ka se, Mulimu u ka beleka ni kubonahalisa Linzwi lani. Sina mo ne ni ambolezi ni mina maabani busihu, Mulimu ki yena ya itoloke za Hae. Mulimu ha tokwi mutu ku Mu tolokela Linzwi. Wa itolokelanga Lona ili Yena, ka ku Li bonahalisa, ku Li bonahalisa patalaza. Mi cwale Mulimu ha bulela kuli Uka eza sika, kipeto Wa si eza, hakusana puzo ni yekana ku zona. Kona Mwa li ezeza cwalo.

¹⁰ Kacwalo Mulimu ulu ezelize nzila. Mulimu ulata bana ba Hae. U lata sicaba sa Hae. U bata ku ba tusa. U bata ku mi tusa hahulu kufita mo mu batela tuso. Haiba mukona kuba fela ni zeo mwa lipilu za mina, kuli Mulimu wa i takaleza hahulu ku mi tusa kufita mo mu batela kutusehela mina bañi. Kono Una ni nzila, mi yeo kona nzila inosi fela Ya ka beleka ka yona ki ka nzila ya Hae. U swanela kutaha kwa milao ya Hae, isiñi milao ya hao. Milao ya Hae! Mu bata kuli li be ka nzila yeñwi, kono Yena—Yena u mi za nzila ya Hae.

¹¹ Sina Naamani mwa na icimbekela mwa—mwa—mwa mezi a Jordani. Kiñi, na bulezi kuli mezi a mwa naha ya hae ki a kenile mi amande, kono sani ne si sona sa na bulezi mupolofita. “Cimbama mo.” A cimbama hañwi, mbingwa ne i sali teni; ha sikisi, ne i sa li teni. Nana ni ku utwela ni kutaha ka nzila ya Mulimu. Mi ha to utwela Mulimu ka kutala, mbingwa ya fela.

¹² Mi Ni li, busihu boo, kuli haiba lu utwela nzila ya lukisize Mulimu, mbingwa ika fela ya musiya, butuku bu ka zwa, lika kaufela li ka zwa, kono luna ni kutaha ka nzila ya Hae ya lizazi

lee. Cwale, ku cimbama mwa Jordani ne kusine mwa eza sika kaufela sesinde cwale; kufita mo ne kuinezi ku Naamani. Mulao neli wa—wa Majuda. Sishemo ki ka Kreste.

¹³ Kono lusika ni lusika lu na ni kalulo yalona ya Evangeli ye bulezwi kale. Bibeke kona sinulo yetezi ya Jesu Kreste. Hakukoni kuba zeñwi ze ka ekezwa ku Yona, kamba sika se si ka zwiswa ku Yona; mutu ya eza zeo u kutilwe. Ha lukoni ku ekeza sika ku Yona, ku zwisa sika ku Yona. Lu swanela kutalima mwahali Mo ni kubona se si sepesilizwe lusika lo, mi kipeto ni ku si bona ha si ezahala. Yani ki Mulimu ya toloka Linzwi la Hae Tota. Hane I bulezwi kuli, “Mwalyanjo uka itwala,” na itwezi. Yeo ki toloko ya Mulimu ya Lona. Sona sa sepisa, kona Sa ezanga.

¹⁴ Cwale lubona kuli Mulimu ha cinci milao ya Hae mwa kuezeza lika. Yena kamita uezanga lika ka kuswana. Luna luswalelela kucinca ka nako kaufela kakuli lu baba shwa. Luna ni mafosisa a mifuta kaufela, mi lwakona kucinca kuyeñwi kuli lu be hande. Kono Mulimu yena ha palelwi. Keto ya hae yapili i petahalile ka nako kaufela. Hakoni kuekeza kwa butali. Na li yena. . . Ki yena simbule sa butali kamukana. Ki yena butali fela kakutala. Ki yena mata kaufela, ya mata oote, ya fumaneha kai ni kai, uziba lika kamukana, mi ya sa feli. Kacwalo he, Ha bulela sika kaufela, paheka moyo wa hao ku Sona, kakuli ki niti.

¹⁵ Cwale likeleke zeñwi li bulela kuli, “Mi luna ha lu lumeli *Se*, mi lu lumela *sani*.” Mulimu haana ku atula li—li lifasi ka keleke. Wa li atula ka Jesu Kreste, mi Jesu ki yena Linzwi. Uka atula keleke ka Linzwi.

¹⁶ Mi haiba *Ye kona* sinulo ya Jesu Kreste mwa masika kaufela, ni kwa lusika loo, U patuluzi mwa Bibeke mo sa Na ka eza mwa lusika loo; mi ha lu Si bona siezahala, ha lu Mu bona a eza sa Na sepesize kueza. Isiñi kupepwa kwa bwalanjo; fani neli lilimo ze likiti zepeli kwa mulaho. Kono Sa sepesize kueza kacenu, sa Na bulezi kuli Uka eza kacenu, seo kona Sali sona kacenu.

¹⁷ Linako zeñata, batu bali, “Kihande, Ha ni lumeli *Zeo*.” Kihande, muna ni mutoloki wa Eva hape; mungile fela siemba sa Lona, kono isiñi kaufela Lona.

¹⁸ Kacwalo lu bata kuhupula kuli Mulimu u sa li ya swana. Linzwi la Hae, ni Sa bulela, Uka si eza.

¹⁹ Kubonisa kuli Ha cinci. Mwa Genese 1, Naize kuli, “Peu kaufela itahise za mufuta wa yona. Peu ifi ni ifi itahise za mufuta wa yona.” Mi ona foo, lu ngungula fa nto yeñwi foo ye zwisa fateni baba lumela mwa lika zeitahela fela. Hamukoni ku zwakanisa lika. Lunge sina pelesa ni—ni ya. . . mi ni—ni tonki, ku li zwakanisa hamoho, munge mule, kono mule haikoni kupepa ni kuba ni mule yeñwi. I felela ona foo. “Peu kaufela ya mufuta wa yona.” Bakona ku li kopanya, kono za cinca ili zona hape, kubonisa kuli ha li koni ikutahisa cwalo. Batili, sha. I yemela ni kufelela ona fani. Mwakona ku zwakanisa muloho wa sipinaci ni

yemiñwi fela, hamoho, ni kuba ni obizwa kale, kono hamukoni ku li zwakanisa kukuta hape. Batili, sha. Mwakona kuzwakanisa mbonyi; kono mucale mbonyi ya mazwake yeo hape, hakuna se mu ka ba ni sona. Mu lukela ku li zwakanisa ka nako kaufela. Kakuli, Mulimu naize, “Peu kaufela itahise za mufuta wa yona.”

²⁰ Mi cwale, ka kuzwakanisa lika, mutalime seo lifasi likeni ku sona kacenu. Ne ni sweli kubala mutende fa, kuzwa mwa *Reader's Digest*, koo, “Myaha ye mashumi amabeli kuzwa cwale, basali habana kubanga ni limbututu, haiba li zwelapili. Ba ca lico za mazwake.” Taba yateni ki kuli, ba li zwakanisize, mi cwalo ha kona mutu mwa na bupezwi, kuli acange lico za mufuta o cwalo. Neli lukela ku kopanela mwa . . . kamba ku ca ka nzila ye ne li lukisizwe. Kona libaka, kacenu, ha ba sa koni kubuluka nama ni lika zeñwi mo li swanela kubela, ka kuli ki za mazwake, limela za kuselaela milyani, mi, oh, mufuta kaufela wateni. Kaufela zona li zwakanile fela. Li fitile fa sibaka sa kuli lusika lwa batu kaufela lu se lu sinyehile ka lipatisiso za bona kasibili, ka kulika kunga sika sa na bupile hande Mulimu, ni ku si futula kuba ka nzila isili, ka nzila yabona fela. Mu sitange lika Mulimu mwa li ezelize!

²¹ Mane se li fitile mwa sibaka ko balika kuzwakanisa likeleke, kacenu; kuzwa kwa kolobezo ya niti ya Moya o Kenile, kutaha mwa kuswalana mwa mazoho; mufuta wa kufafaleza kokuñwi, kutaha kwa kolobezo ya mezi. Oh, mawi! Taba yateni kaufela ki mazwake. Lu bata kukutela.

²² Simela sa mazwake, mu lukela ku si kombelela ni ku si selaela milyani, ni kuzwisa kwateni likokwani ni tumbombo. Kono isiñi sicalo sa niti se si iketile; sona sina ni mayemo, sitiile, hakuna likokwani ze taha kusona. Sina ni zeñata kusona zekona ku zwisa likokwani.

²³ Mi kona mwa inezi ni Mukreste wa niti cwalo! Ha mulukeli ku mu kombelela ni ku mu ombaomba ka buhata, ni ku mubulelela *se, sani*, kamba *sesiñwi*. Una ni sesiñwi ku yena, ili kolobezo ya Moya o Kenile, ye nepela lika kaufela kwande. Ha mulukeli ku mu kombelela kombelela, kakuli ki sicalo sa luli sa Mulimu. Una ni sesiñwi ku yena se si lwana. Mukreste u lwana ka mayemo kaufela a sibaka fa yema. Una ni kueza cwalo, haiba u kulubela kuba teni inza pila. Mi, ka kueza cwalo, kuna ni Sesiñwi ku yena se si mu tokomela.

²⁴ Eva na likile kuzwakanisa Linzwi, kwa simuluhlo. Mulimu amu bulelela kuli, “Zazi le mu ka ca kuyona, lona lizazi leo mu ka shwa.” Na likile ku Li zwakanisa ni zibo ya na mufile Satani. Mi ha na ezize cwalo, alatehisa lubasi lwa batu kaufela, ona fani, ku diabulosi, nako ya na lika ku zwakanisa Linzwi la Mulimu le li sa zwakanisiwi ni zibo.

²⁵ Ha lizweleli kwa zibo ya Linzwi, litaha ka mata a Moya o Kenile! “Ha si ka mata, nihaiba ka bulena, kono ka Moya

wa Ka,” kubulela Mulena. Cwalo kona mwa ezezanga Mulimu cwalo. Linzwi la Mulimu kona Peu ya Bupilo Bobusafeli.

²⁶ Haiba ulika ku Li zwakanisa, u ka eza sikamañi fo? U ka ipulaya ka Lona. Halina ku beleka. Halina ku kopana neba hanyinyani inge oli mo i sakoneli kukopanela ni mezi. Halina kuswalana.

²⁷ Bali kuba, ka nzila ifi kaufela, bafumane nto yende yefita nzila ya Mulimu mwa kuezeza lika. Mwa ziba, ha ba si ka fumana nzila, yende, ya mo ilukela kundondolelwa kuhu mwa lifasi le, haili kuli kazwinyani ka cocomone fa sikapi sa kona. Kana mwa ziba cwalo? Ha ba si ka fumana nzila yeñwi yende. Kazwinyani kateni ka tahanga ni ngo kwa mafelelezo a—kwa mafelelezo a mulomo wa kona. Mi ona mulomo nyana o ka nani wani, uka itusiswa ka kuñwalaula, kuñwalaula ona cwalo, kufita toho yakona kona yekalisa, ka zwiseza toho yakona fande, ka ipumanela nzila hande. Ki nzila ya lukisize Mulimu. A mu ka ka hoha mwa sikapi, mu ka ka bulaya. Ha kana kupila haiba mu ka hoha kuzwa mwa sikapi. Ka na ni kutaha ka nzila ya Mulimu.

²⁸ Bwani kona butata bobuli ni Bakreste kacenu. Lu lata hahulu ku ba lamba lamba mulola o bunolo, ni ku ba swala mwa mazoho ni ku ba kenya mwahali ka kunutu, ni ku ba kopanya mwa keleke. Se ba tokwa ki sihalaleho sa mufuta wa kale ko ba lukela kulapela katata, kufitela ku baitusisa ilibona, batahe ka nzila ya lukisize Mulimu, kufitela ba lukuluha kwa lifasi. Butata bwateni, kacenu, babeya libizo la bona mwa buka ni kuikopanya kwa keleke, mi kona fela zeliteni ku zona. Kono nzila ya Mulimu, nzila ye lukisizwe, ki kuina ona fani ni kubeleka katata, kufitela Mulimu akufa Kupepwa sinca. Yeo luli ki niti. Mu ka comole mwateni, mu ka ka bulaya.

²⁹ Bwani kona butata, kacenu, ni sicaba. Kupepwa sinca, kaufela bona ba ku mbwinja. Ha ba li tabeli. Oh, ba yolisize sika sisili mwa Kupepwa sinca, “amutahe mu lumele, mi kona fela ze mulukela kueza.” Diabulosi wa lumela, yena kasibili, mi muziba kuli ha si ka pepwa sinca. Kuna ni Kupepwa sinca. Kuna ni se si zamaelela ni sona, ki mukwa o sa swaneli, mane ha lina mayemo mwa lifasi.

³⁰ Kupepwa kaufela ki busafa. Hanina taba kamba ki kai. Haiba ki mwa lipepelo la likulube, kamba—kamba sipatela. Kupepa ki busafa.

³¹ Kona mo kuinezi ni Kupepwa sinca! Ku ka kuezisa lika zo sa leli kueza. Ku ka kutiseza kuya fa katala ni kulila, kuhuwa, kutapisa mipende yo ipentile kwa sifateho, kunanula mazoho a hao, kulumba Mulimu, kubulela ka malimi, ni lika za mifuta kaufela. Kupepwa sinca ku ka eza cwalo kakuli ki nzila ya lukisize Mulimu ya kupepwa sinca kayona.

³² U lukela ku shwa. U lukela kushwa u si ka pepwa kale sinca. Peu kaufela i lukela kushwa i si ka fetulwa kale hape. Kwanda

kuli i shwe, ika siala inosi. Mutu una ni kushwa kwa minahano ya hae. Una ni kushwa kwa munahano wa sika kaufela kwanda Linzwi la Mulimu, mi atahe ka nzila ya Hae. Ani kona mayemo a Mulimu. Ha lu Mu katani fa mihupulo yaluna; lu kopana ni Yena fa mayemo a Za bulezi kuli lueze. Yeo kona nzila ya lukisize Mulimu ya lika. Sicaba sa i kekuluha; ha ba i tabeli. Kono ki niti, ka kuswana fela. Ika, itisa lifu, mu u swanela kushwa, kushwa kwa kunahana kwa hao.

³³ “Kihande, Ni ziba kuli Bibebe ibulela cwalo, kono ha Ni utwisisi.” Konakuli u inelele ona fo pili kufitela Mulimu a li patulula. Yeo kona niti. Ina kuba . . . Koo kona Kupepwa sinca.

³⁴ Macikwi ni makwali, ha ba ka fumana nzila yende ya kuli liye kwa Mboela, kwanda kuba hamoho pili. Mi yeo ki niti. Mu ka libona kaufela ha litaha hamoho mi li ka taha cwalo zona luli, kuna ni ngana yeñwi ye litisa hamoho, mi kipeto litaha hamoho ni kutaha kulo kulikuñwi li si ka fufa kale, li si ka ya kale kwa Mboela. Ki sikamañi seo? Seli nako ya ancafazo, ha li kopana hamoho. Kana mukile mwa utwa fateni lilata leli cwalo mwa bupilo bwamina, sina ku utwa macikwi ani ha taha hamoho, kamba lipato? Nali kuba ni utwe ze cwalo! Mi lina . . . Hakuna mukwa usili, o lukela kueza ka ona.

³⁵ Linako zeñata, mwa mishitu, Na bonanga makalelo a pili a maliha, mwa Canada. Sikwata sa macikwi se si ndondolelwa ona ona lisa lani, ha li si ka zwa fa lisa lani, ni yenyinyani kaufela ha i si ka zwa kale fateni. Mi taba yapili mwa ziba, ku kangela ku taha kuzwa kwa Mutulo. Licikwi nyana le, licikwi la kale, li pepilwe fela lili mueteleli, la zwela kwani mi liba mwa lisa lani, i namulula mulala wayona mwa halimu, ni kulila hane kamba ha ketalizoho, mi kipeto licikwi kaufelali linzi mwa lisa litaha ku yona. Mi kipeto ya nanuha yani, ni kuliba fela hande kwa Louisiana ka mo ikonela kuyela, ko ku limilwe laisi.

³⁶ Kiñi? Ha ba si ka fumana nzila yende kuli i zamaye kwani. Ha mukoni ku li lisa hamoho. Mu libeye mwa sikala ni . . . mwa sikalamunanga, ni ku liisa kwani. Pato yani ina ni ngana kufita fani. Mi mwa ibeya mwa sikalamunanga seo, ku isa ku lo kwani, iziba kuli ilibile kwa kubulaiwa. Yeo luli ki niti. I ya ka nzila ye lukisizwe ki Mulimu.

³⁷ Cwalo kona mutu mwa lukela kuezeza kacenu, isiñi ku lisiwa ka sikalamunanga sa likopano. Kono litaha ka nzila ya bulezi Mulimu kuli kona ya kutaha ka yona, ka kolobezo ya Moya o Kenile ni Kupepwa sinca, ku kubukanela fa ancafazo. Isiñi kuikopanya kwa keleke, ku kupelela munyako ni munyako, ni kufa mitende; kono haili Kupepwa, ka kupepwa sinca, kutazwa ka Moya o Kenile, ka nzila ya Mulimu, inza lukuluhile ku zwa mwa lifasi. Luli! Kulumela Linzwi la Mulimu! Hola ki ye. Seo kona se lu lukela ku lumela.

38 Muuna, ha ukoni. . . Hanina taba kamba ki batu babakai baba ka lika kuya kwa lisa la macikwi lani ni kubulela kuli, “Cwale a mu libelele fa muzuzu, mina lipato zenyinyani, nina ni se ni bata kuambola ku mina. Luna ni pato ye itutile kwanu. Yena ni Ph.D. ni LL.D. Na mi bulelela, wakona ku mi zamaisa.”

39 Macikwi ani ana ni ngana hahulu kufita fani. Eeni, sha. Halina taba ni tuto yenca ya hae, kaufela se ili sona. Zakona ku ziba mulilelo wa hae. Ki ngana ya mwahali. Oh, mawi! Keleke ilukela kuziba hahulu za Linzwi la Mulimu!

40 Ki mulumo omuñwi o sa ketehani. Biblele ibulezi kuli, Paulusi naize, “Haiba tolombita ilila ka mulumo o sa ketehani, ki mañi ya ka itukiseza ndwa?” Yeo ki niti, haiba keleke—haiba keleke iliza mulumo o sa ketehani wa “kuikopanya.”

41 Mulimu naize, “Kupepwa!” Se ne siezizwe ki Kupepwa fani, Kupepwa kueza zeswana kacenu, kakuli Jesu Krete ki ya swana maabani, kacenu, ni kuyakuile. Sa Nali sona ka nako yani, U cwalo ni kacenu. Se ne baezize ka nako yani, ki nto yeswana ye lueza ni kacenu. Ka mo ne Li fumanezi kwani, ki mukwa o swana ni mo baezeza kacenu. Nto yeswana ki ye baezize kacenu, kona sene ba nani kwa mulaho kwani. Haiba Li taha ka mukwa o cwalo, Li ka taha ka nzila ona yeo. Yani kona nzila, nzila ye lukisizwe ki Mulimu. Ha i cinci.

42 Macikwi ha cinci. Kaufela ona a kubukananga, mwana ni mwana, ni kuya kwa mutulo, mboela, ni kaufela ko abata kuya. A kubukana pili.

43 Kona mwa ezezanga Mulimu cwalo. U lumanga Linzwi la Hae ka mwaha, mwaha wateni woo, kipeto La iponahaza. Mi ha Ni na taba kamba ku zwelapili lika ze kai; ha ba bona Linzwi la Mulimu leli sepisizwe mwa lizazi lateni, ha liiponahaza ni ku sepiywa, hakuna se si ka ba paleliwa. “Mwalanjo uka itwala.” Mi ha ba bulela kuli. . .

44 “Mulena Mulimu wa luna uka zusa Mupolofita ya swana sina na,” Mushe abulela.

45 Mi ha ba bona Muuna yo ataha ku to eza lika za Na ezize, ne ba ziba kuli yani neli yena Mesia. Fani Filipi hana boni sani ha si ezahala, ki hali, “Ki wena Krete. Ki wena Mulena wa Isilaele.” Na li zibile kakuli Linzwi ne li sepisize, mi neli pila mwa lizazi lateni. Hakuna taba kamba Bafarisi neli babakai, Basaduki, be ne ba yemi bukaufi, Baituti ba za Bumulimu, ne li si ka mu paleliwa neba hanyinyani, kakuli na libelela sisupo sani. Ha si bona si ezahala, sani neli sisupo sa hola. Sani kona sene ba libelela, nzila ye lukisizwe ki Mulimu. Eeni, sha.

46 Cwale hamukoni kufa pato, tuto. Haikoni kueza cwalo. Haikoni kubata sika. Lipato zeñwi halikoni ku i latelela, hakuna taba kamba ki ma digiri amakai abule akuli unani. “Cwale, mutalime fa, Ni keni sikolo sa lipato. Na ziba zeo kaufela. Ni felize lituto zaka. Ni ziba lika ze kaufela.” Halina kutusa niheba

hanyinyani. Hakuna niheba pato yekana yazona yekona ku i latelela, haiba ki lipato za niti, amen, kakuli li bata sisupo sesiñwi. Ha li bona sisupo sani, za si lumela.

⁴⁷ Mi haiba pato ina ni nzila ya kuziba lika ka yona, kucwani kanti ku Mukreste ya pepilwe sinca? Lu lukela kuziba Jesu Kreste mwa mata a zuho ya Hae. Kiniti. Mulimu u li eza ka nzila ye lukisizwe ki Mulimu.

⁴⁸ Muhupule, tuto haikoni kuba sibelekiso sa ku li zamaisa kuliba kwa sibaka sa lukisize Mulimu. Sika se li nani ki ngana ya mwahali. Mi ona, ona macikwi ani, aa ziba kuli ona ngana yani ika a isa kwa sibaka sa lukisize Mulimu.

⁴⁹ Ni ona Moya o Kenile u isa Keleke kwa sibaka sa lukisize Mulimu. Isiñi ku ikopanya kwa keleke, kono ki kutazwa ka Pata ya Hae, kubona Linzwi la Hae li iponahaza, ni kupakiwa. Yani kona nzila ye lukisizwe ki Mulimu kwa keleke, kamita, kwa sicaba, ku ba tisa mwa sibaka sa ba lukiselize Mulimu. Ona cwalo kona mo ilukela kubela keleke kacenu. Cwale, lu ziba kuli yeo ki niti.

⁵⁰ Hakuna mukwa o munde hape wakuli . . . Ha ba si ka fumana nzila yende kuli mbututu a fiwe sa bata konji ka ku si lilela. Haiba mu mufa mulangu, ni kubulela kuli, “Junior, wena una ni fela mazazi amalalu a kupepwa, kono cwale ha u bata, ha ubata botela ya hao, u nanule mulangu wo ni ku u liza,” mubone haiba lika beleka. Ha li beleki. Mbututu u lilela sa bata. Yeo kona nzila ya lukisize Mulimu. Ha u nzo lila cwalo. . . Musike mwa shapa mwana yoo, u sweli fela kulatelela nzila ya lukisize Mulimu. Ubata nto yeñwi. Yeo ki niti. Kona za ziba fela ha bata kubiza bo mahe; ki kuhuwa, ku si lilela. Yeo ki niti.

⁵¹ Mulimu kona mwa latela cwalo kwa bana ba Hae. Mulimu ubata ona cwalo kwa bana ba Hae baba lumela. Na ezize. Isiñi manzwi a butali, isiñi lituto zeñwi ze ipitezi za bulapeli, lituto za bulapeli za kuluta. Ubata kuli mu lilelange ze mutokwa. Mi yeo kona swanelo, mu no lilelanga lika! Mu omelezi hahulu ni kuandalala, hamuna ku fumana sika cwalo. Haiba wa kona kuba ya bunolo nyana, ni kulila, Mulimu uka kufa zona. U tabela ku utwa bana ba Hae ha ba lila. Zibisa kutokwa kwa hao ku Mulimu! Mulimu u bata cwalo. Yani kona nzila ya Hae ye lukisizwe. U lile ka zona! Kona mo ba lilelanga limbututu; kona Mwa batela ku ku utwela ha u lila.

“Kulila kuisa nako yekuma kai?”

⁵² Kana mbututu u lilanga nako yekuma kai? Kufitela a i kutwa kukula. Mi kona mwa lukela ku ezeza Mukreste ya lumela, mwana a Mulimu. Hiaba u bona kuli Mulimu na file sepiso, usike wa itoboha yona, lila kufitela i alabiwa. Mulile kufitela mubona Mulimu ha paka Linzwi la Hae. Mi Mulimu ha bonahalisa Linzwi la Hae, ni ku paka kuli liteni mo, fo he ha mu sa lukela kulila hape; haiba u i amuhela, ikele mi u itumele ku Yena

ka yona. Kufitela u eza ona cwalo, uhuwe katata kufitela u amuhela. Na lata cwalo, tundamena, ku swalelela.

⁵³ Iswiñi sicalo sa mazwake, isiñi se si lukela ku kombelelwa ni ku babalelwa, ni kushimbiwa kai ni kai. Bakreste ki ba niti, luli, baba pepilwe, ki likalulo za Mulimu. Ba lwanela sibaka sa bona, ni kulwana kufitela bafeza mwa lifasi moo. Muzamao wateni kaufela ki ndwa.

⁵⁴ Mulimu na bulelezi Mushe kuli Na mu file naha. Na bulelezi Joshua ali, “Sibaka kaufela fo lihutu, ligandi za mahutu a mina, li ka hata, Ni mi file sona.” Nebana ni kulwanela sibaka sa mubu kaufela wateni. Kona mo lu lwanela sibaka sa mubu kaufela ni luna. Ha ki sika se mukona kukombelela ni ku ombaomba, ni lika ze cwalo, ni kubulela kuli, “Kihande, Ni ka mi isa kwani, kubona se mu nahana ka sona. Mu utwahalise muhupulo wa mina.” Zeo ha li lukeli kutaha.

⁵⁵ Mutahe ka ciseho yetuna. Mutahe ka mukwa wa kuli mu ka inelela foo kufitela lifela. Muine fani kufitela Mulimu a alaba ni kubonahalisa. Mutu ya lumela ku Mulimu, wakona kubona Pata ya Mulimu, wa utwa Kubateni kwa Mulimu, u lemuhu Pata ya Mulimu, ni kuziba kuli U teñi faa. Uteni mo ku to alaba lika kaufela Za sepiseze mwa lizazi le. Mi, mulile kufitela muba ni yona! Mu kumalele ku Yena. Musike mwa nanuha, haiba muna i kuina musihali ni busihu. Mulimu ha lati kuli bana ba Hae ba teezeze kwa makande a za bunangu fela. Ubata kuli ba lile ku Lona, kufitela sepiso i talelezwa.

⁵⁶ Abrahamama fa na nzi mwa butokwa kubata sitabelo. Kiñi sene si ezahalile? Mulimu a mufa ngunyana. Yeo ki nzila ye lukisizwe ki Mulimu. Na tokwa sitabelo, kacwalo Mulimu a si tisa. Kasamulaho nyana, abiza sibaka sani kuli *Jehova-Jaire*, “Mulena uka iponela sitabelo Iliyena.”

⁵⁷ Cwale, Jobo, nako yeñwi, mupolofita wa kale, Jobo. Nali mupolofita. Na keni mwa butata. Satani na bata ku mu lika, mi a mu taseza ka limboongola. Mi anga bana ba hae, alwala ni tutu ya hae, alwala kaufela za na bile ni zona, mi a mu beya mwa butuku bwa limbongola.

⁵⁸ Mi baombaombi ba hae bataha, kiñi ze ne ba ezize? Nekusina se ne ba tisize kwanda lisomo, ku mu seha, ku mu bulelela kuli, “Kiñi, u ezize sibi, kwa mukunda.”

⁵⁹ Mi Jobo azwelapili fela. A lila. Na ziba hande kuli na latelela litaelo za Mulimu. Na ezize fela ona cwalo mwa na sepiselize Mulimu kuli aeze. Sa na mu sepisize Mulimu, kuli Uka mu yema bukaufi, mwatasa sitabelo sa ku cisa, mi aina ona cwalo.

⁶⁰ Kacwalo, Mulimu a mu fa pono. Nali mupolofita. Ki sikamañi sa na boni? Na boni Linzwi, Jesu Krete. Ki hali, “Ni ziba kuli Muliululi waka wa pila. Mi ka lizazi la mafelelezo, Uka yema mwa lifasi. Nihaike likokwani za mubili li ka sinyu mubili woo, kono ona mwa mubili mo ki mo Ni ka bona Mulimu.”

Mwabona, A mu fa pono ya zuho. Yena ka kuba mupolofita, na boni Linzwi. Na boni Linzwi mi a ziba kuli masapo a hae ni mubili wa hae ne lika zuha hape mwa lizazi la mafelelezo. A buziwa haiba na ziba kwa na pila Mulimu, haiba na ka mubona.

⁶¹ Ki hali, “Palisa ya shwa, ya shoshela hape; kota ha iwiseza matali fafasi, ika zuha hape; kono mutu ha lobala upumeha moya, wa yunda, mi ukai hape? O kambe No ka ni pata mwa libita, mi uni buluke mwa sibaka sa mukunda kufitela buhali bwa Hao bufela.”

⁶² Mi mishika yakala kuluma, mamonyi akala ku monyeha, Moya wa Mulena wataha fahalimwa mupolofita. Mi a yema, mi abona Kutaha kwa Mulena, mi a huwa ali, “Na ziba kuli Muliululi waka wa pila, mi ka lizazi la mafelelezo Uka yema mwa lifasi. Ni ha likokwani za mubili lika sinyu mubili woo, mwa mubili waka wo Ni ka bona Mulimu.” Mulimu na lukisize Linzwi, Jesu Kreste, mi a Mu bona ni ku Mu biza kuli ki Muliululi wa Hae.

⁶³ Isilaele na tokwa nzila ya kuzwa mwa Egepita kayona, mi Mulimu aba lukisize mupolofita, mupolofita yana pakile Linzwi lene li sepisizwe ku Abrahamama. Luli, ka nzila ya lukisize Mulimu! Ne ba palezwi kuluta musole, ne ba palelwa kueza *se*, ne ba palelwa kueza *sani*. Taba fela yene ba ezize neli kulibelela nzila ya lukisize Mulimu. Mi A bulela, ali, “Na ka lukulula sicaba sani, kasamulaho wa myaha ye mianda yemine. Sicaba sa hae ne si kaba mwa litamo, kono Na ka ba lamulela ka lizoho le li mata. Na ka bonisa lisupo za Hae ni ze komokisa, ni kuamuhela kanya mwa naha yani.”

⁶⁴ Ki yo muuna ataha, ha ne ba lila ni ku lila! Mi cwale muhupule, kulila kaufela ne li si ka ba lamulela, kufitela nako yani ikwana.

⁶⁵ Lika ze lubona ze kacenu, ne li si ka ezahala myaha ye mashumi amabeli kwa mulaho, kamba myaha ye mashumi amane kwa mulaho. Ki kacenu fo li ezahalela. Ye ki yona hola! Ye kona nako! Cwale seli nako ya kutalelezwa. Kiñi? Mulimu na sepisize cwalo, mi ki ze fa.

⁶⁶ Ne baize, myaha ye mwanda kwa mulaho, kuli, “Kolobezo ya Moya o Kenile haikoni kuba hape.” Ne baize, myaha ye mashumi aketalizoho yefitile kuli, “Moya o Kenile. . .” Kono mina sicaba sa Pentekota ne mu ba bonisize, kuli neli nako ya Mulimu kuli asulule Moya o Kenile. Hakuna taba kamba ba Methodist, Baptist, Presbyterian, Lutheran neba bulela cwani, ne mu pilile hande ni Linzwi la Mulimu. Baana ba bundume ba zwela kwateni mi ba tundamena kufitela kolobezo ya Moya o Kenile i taha, mi ba bulela ka malimi ni ku lumba Mulimu. Hakuna mutu ya kona ku mi bulelela shutano kaufela. Mulimu ki mutoloki Kasibili Luli; mu li utwile. Hamukoni ku li tatulula,

kono muziba kuli muna ni zona. Ki mañi yakona kutatulula Mulimu? Hakuna mutu ya kona.

67 Hani koni ku mi bulelela mo Mulimu aboniseza pono, kono Ni ziba kuli za ezahalanga. Haniboni mo Mulimu akona kuezeza lika zee. Ha ki musebezi wa ka kutoloka zeo. Yena, upila anosi. Ki yena Elohim, yena ya ipile Anosi. Na ni mutanga Hae feela. Ni ziba kuli Na li sepsize, mi Ni ziba kuli liteni mo. Yeo kwateni Na i ziba. Na ziba cwalo, kuli ki Ya swana maabani, kacenu, ni kuyakuile. Na ziba kuli Na sepsize se, mi Mulimu uteni mo ku to fa sepiso ya Hae kuba ya niti. Eehe. Nzila ye lukisizwe ki Mulimu!

68 Isilaele na filwe mupolofita, yana pakile Linzwi, mi mane ba la mulelwa. Mupolofita yo, Mushe, na pilile ka myaha ye miñata nyana mwa lihalaupa, myaha ye mashumi amane, inza katazana ni sicaba se, kulika ku ba buluka kufitela aba isa kwa naha ya sepiso. Sa fita fa sibaka, muuna yani na shwile; nali wa myaha ye mwanda ni mashumi amabeli ya kupepwa. Ne ku sina sibaka sa kuli a shwe. Ha na li bukaufi ni kushwa, Mulimu amu lukiseza Licwe; ili Licwe la na natile mwa lihalaupa, lona Licwe lene li ba latelela, le ne ba nwile ku lona. Mulimu na mu file Licwe, sibaka fa kushwela, koo Mushe na ka shwa lifu la mwa lihalaupa.

69 Fahalimwa Licwe le, Mulimu, tuhela kuli ni shwele kulona Licwe lani! Kona ko Ni bata. Licwe lani neli Krete Jesu. Eeni, sha.

70 Kasamulaho a mano shwa, fa Licwe lani, na tokwa balwali ba mufu. Mulimu amu lumela sikwata sa Mangeloi. Ki kabakalañi ha ne si sikwata sa bahulu ba hae? Kakuli hakuna ya na ka muisa kwa na ya, kono Mangeloi. A muisa fa Pila Mulimu, na tokwa balwali ba mufu mi Mulimu a mu tiseza bona. Na ile ka nzila ye lukisizwe ki Mulimu. Haleluya!

71 Enoke na zamaile myaha ye mianda iketalizoho ni Mulimu, mi a Mu tabisa. Na tokwa nzila ye kambama ya kuya kayona kwa Hae. Mulimu a i lukisa.

72 Elia na kutile Jezabele ka kupenta sifateho, mi ni nzila ya hae yana kenyeze sicaba kueza ka yona. Mi na katezi ni ku botaha, mi na itukisize kuya kwa Hae. Na sa supezi maswe mane na palelwa kusila Jordani; Mulimu a mu lukiseza nzila ya kusilela mwabuse bwa Jordani. Na bata kuya kwa Lihalimu, ku yo bona Mulimu; Mulimu aluma koloi ya mulilo fafasi, ni lipizi, mi ya mu lwala. Nzila ya lukisize Mulimu. Nzila ya lukisize Mulimu. Yena u ezanga fela ona cwalo. Luli. Eeni, sha. Mulimu u tisanga nzila, kamita. Eeni.

73 Baana baba butali, hane bali mwa musipili wa bona kuzwa kwa Babilona, ne ba bona nzila yene ba bata kuya ka yona, kakuli neba ziba kuli Mulena yo na ka pepwa. Ne ba tokwa masupeza nzila; Mulimu a lukisa Naleli. Ba siya lika kaufela kwa mulaho. Ne ba sa tokwi masupeza nzila; ne ba latelela Naleli. Ne

li nzil ya lukisize Mulimu. Mulimu na lukisize nzila, ba latelela Naleli kufitela ba fumana Liseli le li petehile. Oh!

⁷⁴ Lifasi ne li tokwa Mupulusi, zazi leliñwi. Ne ba latehile; ne ba sa zibi cwalo. Ne ba hupula kuli ba pilisizwe, kono ne ba tokwa Mupulusi. Mulimu a tisa Mwana, kuli abe Mupulusi. Kiñi? Hakuna ni yomukana ya na konile kueza cwalo. Nekusina mutu mwa lifasi, kutokwa neba alimuñwi mwa Lihalimu, kai kamba kai, ya na kona kueza cwalo. Mulimu a apesa mwalanjo, a itwala mi apepa Mwana wa Mucaha. Mi yena Mwana wa Mucaha yani ne si Mujuda kamba Mulicaba. Na li Mulimu, ya bonahalile mwa nama, yena Anosi fela ya na kona kuliulula. Mali a Hae a lu pilisa. Mali a Hae a lu folisa. Ki ona Mali ani e lukona kuyema ku ona, kwa sepiso kaufela ya Na file. Mulimu na sepisize kueza cwalo.

⁷⁵ Mulimu ukopananga fela ni mulapeli mwa Mali, ni mwatasa Mali. Isilaele nana ni sibaka silisiñwi sa ku kopana ni Mulimu kusona. Isiñi mwa. . . Mulimu una ni Sibaka silisiñwi, kacenu, koo A—A kopana ni mulapeli; isiñi kuba Methodist, Baptist, kamba Pentekota. U ba katanyeza mwatasa Mali. Sani kona fela sibaka sinosi sa nani Mulimu; isiñi mwa kopano, isiñi mwa tamahano. Kono mwa Mali kona koo Jesu Kreste akopana ni mulapeli wa Hae. “Ha Ni bona Mali!” Yani kona nzila ye lukisizwe ki Mulimu.

⁷⁶ Kasamulaho keleke imano ikolwisisa handende, ha ba Mu bona, kuli ki Yena Mesia!

⁷⁷ Fani musali yomunyinyani fa siliba, hana tokwa Mupulusi, na tokwa sika sa kubonisa. Na bile kwa keleke ni lika zeñwi kaufela, mi ne ba boni tuto ya tumelo ye ni tuto ya tumelo yani, kufitela, li mu bisa fela lihule. Za mu latela mwa mukwakwa. Zazi leliñwi, na ya kwa ku nga buleke bwa mezi, mwendi ka ilebene kiloko mwa musihali, mi fani nekuina ni Muuna; Mujuda fahalimu faa, fahule nyana cwalo. Mi ki hali. . .

⁷⁸ Nako ya na lula buleke bwa hae fafasi fa windilasi, kuli ake mezi, autwa Muuna ya bulela kuli, “Musali, aku Ni fe kwa mezi.” Mi ki hali. . .

⁷⁹ A fetuha kapili, mi na nahana kuli Yani neli fela mutu sina babañwi Majuda kaufela, kakuli Nali fela mutu kuya ka mubili mo u zibelwa. Na li Mutu; yana ca, kunwa, kulobala, sina mo lu ezeza. Na li mutu luli kuli mane A shwa, kono ibo Na li Mulimu. Mi lu fumana hande, kuli fani. . .

⁸⁰ Ali “Ha ki swanelo kuli mina Majuda mu kupe Masamaria lika zecwalo.”

⁸¹ Ki hali, “Kono kambe wa ziba Yo ambola ni yena, no ka Ni kupa mezi.” Ali, “Zamaya uyo biza muuna hao mi mutahe kwanu.”

Musali ali, “Ha ni na muuna.”

82 Ali, “U bulezi niti. Una ni ba ketalizoho, mi yena yo pila ni yena cwale ha ki muuna hao.” Ki sikamañi sene si ezahalile? Mulimu na mu lukiselize sika.

83 Musali ali, “Muñaka, Ni lemuha kuli U Mupolofita. Lu ziba kuli Mesia ha ka taha, U ka lu bulelela litaba zee. Kona Sa ka eza. Linzwi li bulela ona cwalo. Lu li libelezi. Ni nyikilwe mane ni katezi litaba zeo kaufela, lituto za litumelo za bona ni lika zeñwi, Bafarisi, Basaduki, ni ba Heroda, kaufela seo sili sona. Kono lu ziba kuli Mesia wa taha, nako ya Ha taha. U bulela sikamañi ka seo?”

84 Ki hali, “Kina Luli.” Amen! Mulimu na lukisize nzila. Musali asiya ndondo ya mezi, ali musali ya cincize, ni ku matela mwa munzi, mi ali, “Amutahe, muto bona Muuna ya Ni bulelezi lika ze Ni ezize. Kana yo ha ki yena Mesia?”

85 Pitrosi, inza teezeza kwa likande la Andreasi, mi linako zeñata ne li utwanga, na utwile Andreasi ha bulela za Joani ku zibahalisa Mesia, mi Muuna, ni lika ze kaufela ze zahalile. Neli kunutu kaufela ku Pitrosi. Kono zazi leliñwi natile ni Andreasi, ku to bona Jesu. Mi ha yo fita fa Pila Jesu, Jesu a mu talima, mi ki Hali, “Libizo la hao ki wena Simoni, mi u mwana Jonasi.” Mulimu na lukisize nzila ya Pitrosi kuli abone Yo nali Yena. Nali yena Mesia yani.

86 Cwale lu fumana cwana, kuli kasamulaho Jesu amana kushwa, ni kumbamela kwa Lihalimu, Keleke ne i tokwa Mata, a kupaka. Mulimu na ba file Pentekota. A lukisa Pentekota.

87 Lilimo ze likiti zepeli lifitile, balikani. Lilimo ze likiti zepeli lifitile. Mwa mazazi a maungulo aa, luna ni cwalo, mutu ukeni mwa mulao wa Bukreste mi u Li lyanganisize hape, ku Li zwakanisa ni lituto za litumelo, likeleke, likopano, lipulelo za ngana fela kihona, kufitela Mata ni lika za niti za Evangeli ya Krete li lateha luli. Mi ki luna ba fa ni Linzwi leli sepisizwe mwa mazazi a maungulo a, se si ka ezahala, se si ka nga sibaka; mutu ha Si lumeli. Ba zwile ku Zona. Mu ba buze haiba ki Bakreste; ba kali, “Ni wa siemba sa *kuli-ni-kuli*.” Seo ha si talusi nto ni iliñwi. U lukela kuba Mukreste ka kupepwa. Cwale luna ni taba yateni kaufela mwa Babilona hape, kasamulaho wa myaha ye likiti zepeli.

88 Keleke kacenu i tokwa Mata ni Niti, hape. Oh! Mulimu na zusize Mwana Hae, kuli se si tokomelwe, kakuli Na ize, “Fa nako nyana lifasi halina ku Ni bona; kono mina mu ka Ni bona, kakuli Ni kaba ni mina, mane mwahala mina.” Lu fumana cwana, mwa Maheberu 13:8, “Yena wa swana maabani, kacenu, ni kuyakuile.”

89 Lu fumana cwana, mwa Malaki 4, kuli Na lu sepisize Liñusa mwa la mazazi a maungulo, le li ka “kutisa Tumelo ya sicaba kwa bashemi hape.” Na sepisize cwalo, mwa mazazi a maungulo.

⁹⁰ Hape na sepisize, mwa Joani 14:12, “Ya lumela ku Na, misebezi ye Ni eza uka i eza ni yena. Mane kufita ni yee, kamba yemituna ku yee, ki ya ka eza, kakuli Ni ya Ku Ndate.”

⁹¹ Na sweli kuambola zazi leliñwi. Se bali, “Muluti, lu bonise sisupo.”

⁹² Ki hali, “Lusika lo lu fokola lwa bubuki lubata sisupo.” Lwani kona lusika lo lupila ku lona kacenu. Ki hali, “Mi Ni ka bafa sisupo. Kakuli sina Jonasi mwa na bezi mwa mba ya tapi, mazazi amalalu ni masihu, kona ni yena Mwana mutu mwa lukela kubela mwa pilu ya lifasi, mazazi amalalu ni masihu.”

⁹³ Ki sisupo sa mufuta mañi se si ka fiwa kwa lusika lo lu maswe lwa bubuki? Ki sisupo sa zuho. Mi seo kona se lu sepisizwe kacenu, sisupo sa zuho kuli U sa pila, Ki ya swana maabani, kacenu, ni kuyakuile.

⁹⁴ Na ize, “Sina mo ne kuinezi mwa mazazi a Lota,” ka mo ne lufezi ku zona maabani busihu. “Mazazi a Lota, sene si ezahalile mwa mazazi a Lota, kona mo ku kabeli ni ha taha Mwana mutu.” Litaba ze lu sepisizwe, Mañolo amañata mane. Kuli lusike lwa sinyi nako. . . “Fa nako nyana lifasi halina ku Ni bona. *Kosmos*, ‘ki muezozo, lusika lwa keleke,’ ha ba na ku Ni bona hape. Kono mina mu ka Ni bona, kakuli Ni kaba ni mina, mane mwahala mina, kuisa kwa mafelelezo a lusika.” “Jesu Krete ki ya swana maabani, kacenu, ni kuyakuile.” Ki sikamañi seo? Ki sisupo se si lukisizwe sa Mulimu, nzila ye lukisizwe ya Mulimu.

⁹⁵ Abrahama na libelela mwana. Sisupo sa mafelelezo sa na boni ku si kaba kale sinyeho ya Bamacaba, neli Mulimu yana bonahalile mwa nama ya butu, yana zibile likunutu za pilu ya Sarah ha nali mwa tende. Jesu naize, “Sani si ka kutela hape fa kutaha kwa Mwana mutu.” Muzwale, kezeli, Ni lumela kuli lupila mwa lizazi lateni. Ni lumela kuli le kona lizazi la sepišo.

⁹⁶ Mu lukela kuba ni tumelo ku se mueza. Haiba ha mu na tumelo, haiba mukona fela ku litalima ka kuakaleza. . . Linzwi la kuli *kuakaleza*, kuya ka Webster, litalusa, “kukena mwa lika kusina bundume.” Kono cwale Linzwi ha lisepisa sika, ni Mulimu uyema kwa mulaho wa Linzwi, fo he kipeto ha u sa alakeza ni hanyinyani. U eza handende za bulezi Mulimu kuli u eze, mi ni Yena u tamehile ku Li yemela.

⁹⁷ Mutu yomutuna, ya zibahala, wa—wa ancafazo, lilimo zeñata kwa mulaho, Ne ni muboni inge Ni sa li fela mushimani yomunyinyani, neli Paul Rader. Na bulezi likande, zazi leliñwi, le li ni katalize kamita. Ki hali, “Zazi leliñwi, ne lu sweli kulema likota.” Na li mulemi wa malogi, kwani kwa Oregon, ni kubulela kuli mulena hae na mu bulelezi kupahama fahalimwa lilundu. Na sweli kulola. Kwa na inzi luli, ka nako yani, nali kwatasi mwa lioli; mi aswalwa ki fibebe, kucisa luli, mi na shwa. Ba ya ku dokota, kono neli limaili ni limaili kwahule, ka mukolo.

⁹⁸ Dokota a si ka fita kale kwani, Paul akala kufelwa ki mata, akula ka kutotobela ni ku totobela. A biza musala hae ya sepahala. Ki hali, “Mulatiwa, se kuba bunsu mwa sibaka, bunsu luli, se bukwahela.” Mi a kutela hape mwa koma.

⁹⁹ Mi asino eza cwalo, na bulezi kuli na lola, ha na li mwa koma, kuti mulena hae a mu luma ku yo leka kota. A fumana kota, a wisa kota, a kakatelisa capu ku yona, mi aya kuli a i nope. a palelwa ku inopa. A li mata a hae na sa fela. A palelwa fela ku i nopa. Ki hali, “Fo ikuma kota yani kaufela, luli Nakona ku i nanula. Ha lu likeni hape.” Mi ki ha tuluka ni kuinalula, a ikataza luli kufitela a botaha luli. Na inzi kwa tuko a kota, mi ali, “Ha ni zibi fela se Ni ka eza. Mulena ka ubata kota ye kwani kwa mafulo, mi ha Ni koni ku i nanula.”

¹⁰⁰ Ali ki ha utwa Linzwi le linde hahulu ku la kile autwa fateni, ne li mulena hae ya na bulela; kono ali, ha fetuha kuli abone mulena hae kwa na inzi, neli Mulena Jesu. Ki hali, “Paul, kiñi zo lwanela hahulu cwana? Kiñi so filikanezi cwana? Wabona fo ku buba mezi ani fani?” Ali, “Kiñi fela ha u sa kashezi musumo wo mwa nuka, ni kupahama fateni u ku kukise? U ka kuisa kwa mafulo.”

¹⁰¹ A tulela fa musumo ni kukala ku kukiswa ki mezi, inza huwa ka kutumusa katata linzwi la hae. “Ni pahami fateni! Ni pahami fateni!”

¹⁰² Muzwale, kezeli, Jesu Krete na sepisize lika ze kuli li ka ezahala mwa mazazi a maungulo. Ni lumela kuli kona mo lupila luli. Ni lumela kuli Yena wa swana maabani, kacenu, ni kuyakuile. Ha ni zibi mo li ezahalezi, kono Ni pahami fa Teni. Ni lumela kuli ki Niti, kakuli Ki yona Evangeli, nzila ye lukisizwe ki Mulimu. Ni lumela kuli ki Liñusa la hola yateni, nako ye lupila ku yona. Ki nzila ye lukisizwe ya Mulimu. Ni pahami fa Teñi!

Kikuli hamuna kupahama hamoho ni na, halunze luinamisa litho zaluna?

¹⁰³ Ndate yakwa Lihalimu, lu pahami kuliba kwa Kanya fa Linzwi la Hao. Lu lumela kuli Linzwi la Hao kona Niti. O Mulimu, mi muuna kaufela ni musali, busihu boo, a pahame Linzwi, mi a hupule, hanza ya cwalo mwa musipili, akone kubulela kuli, “Ni pahami fa sepiso ya Mulimu. I ka ni isa mane nifite kwa Kanya. Ki nzila ye lukisizwe ya Mulimu ku na kacenu. ‘Jesu Krete wa swana maabani, kacenu, ni kuyakuile.’”

¹⁰⁴ No ize, “Nako nyana lifasi halina ku Ni bona hape, kono mina mu ka Ni bona; kakuli Ni kaba ni mina, mane mwahala mina.” No lu sepisize, Mulena, lu ka Ku bona.

¹⁰⁵ Magerike neba tile, nako yeñwi, mi bali, “Muñaka, lu bata kubona Jesu.” Mi ba fiwa lithonolo lani. Mi busihu bo, Mulena, lu bata ku Kubona, ni luns. Ki takazo ya lipilu za luna. Hakuna yakona ku utwa za Hao, konji haiba ubata ku Kubona. Mi haiba Magerike bani ne ba lumelelizwe ku Kubona, mi Wa lu lukiseza

nzila ya ku Kubona, Kamita u ezanga nzila kakuli Wena uya swana maabani, kacenu, ni kuyakuile. Mutanga a tisa Magerike bani fa Pila Hao, mi ba Kubona. Lu lumeleze kolo yeswana busihu bo, Ndate. Luna cwale, kakuba batanga, lutise sicaba se fa Pila Hao. Mi lu bone Jesu, busihu boo, Yali ya swana maabani, kacenu, ni kuyakuile. Lumeleza cwalo, Mulena.

¹⁰⁶ Pilisa baba latehile, Mulena, haiba kuna ni muuna, musali, mushimani, kamba musizana. Ha lubona naha ya luna mo se i sinyehezi ka lipulao ni likebenga zepumaka mimizo, ni kulyangana, ni kubona kubola mwa naha kacenu! Ni kubona kubola mwa likeleke, ni ku ba bona ba kena mwa swalisano ya lipulao yani kwani, kakuli ha bayi ka nzila ya lukisize Mulimu! Ba zamaya ka nzila ya lituto zeñwi za litumelo kufita kutaha ka Linzwi.

¹⁰⁷ Mulimu, lu lapela kuli Bakreste ba luli, ba niti, baba pepilwe cwalo, sina mo Ni boniselize, ka kuba macikwi a niti, bona . . . “Lingu za ka liutwa Linzwi la Ka, muenyi halina ku mu latelela.” Mulena, Linzwi la Hao kona Linzwi. Yeo kamita ibile nzila ya Hao ye lukisizwe kwa Keleke ni kwa sicaba, lona Linzwi la Hao. “Linzwi la Hao kona Niti.” Mi ki Wena Linzwi. Mi Bibebe i lu bulelela kuli, “Linzwi la Mulimu li buhali kufita mukwale o lozizwe kafa ni kafa, mane li lemuha milelo ni maikuto a mwa pilu.”

¹⁰⁸ Ki kabakalañi Isilaele ha na si ka bona Mesia wa bona, kanti ne ba bona kuli Nali yena Linzwi luli, ha Na konile kulemuha milelo yeneli mwa lipilu za bona? Kiñi ha be ne ba si ka lemuha? Ne ba li utwisisa ka bapolofita, zene ba utwisisa bapolofita; kono cwale mutalelela wa Mulimu ha u to ezwa ku Mwana Hae, mi A pila mwahala luna, mi ba palelwa ku li bona kakuli nebali libofu.

¹⁰⁹ Mulena, bani babana ni meeto a kwaluhile, busihu boo, halu boneñi Jesu mwahala luna. Mi mutu kaufela ya kula afohiswe. Se ha si feze lika, Mulena, kuli basike, ni kamuta, kuzwa hola ye kuya kwapili . . . kono ki ba ba ka lumela kuli ki Wena Mesia. Ba taha ka nzila ya Mulimu. Buñata bwa bona bateñi mo, busihu boo, ba shwa. Kuna ni babañata mo, busihu cwana, babasike kuba mo biki kuzwa kacenu, haiba Wena, tuso ya Hao ha i tahi.

¹¹⁰ Cwale, Ndate, Wena una ni fela buikalabelo ka so No sepisize. Kono U sepisize kuli lu ka Ku bona. U sepisize kuli so No eza ni luna lu ka si eza. Ye kona nako. Ni li bulezi; Na li lumela. Ni utwile ha U bulezi cwalo; Linzwi la Hao li bulela ona cwalo. U li pakile. Ni ziba kuli ki niti. Cwale ha li zibahale, Mulena. Se ku ñozwi, cwale ha li ezahale, ka libaka la Mubuso wa Mulimu. Amen.

¹¹¹ Hani lumeli kuli lu ka biza mukoloko wa tapelo. Ni lumela kuli Ni ka itusisa fela yona ona fa.

112 Ki babakai ba mina baba kula? Cwale kana muka ba . . . Mu nanuzi mazoho a mina, kupaka kuli mwa kula.

113 Ki babakai ba mina baba ka paka taba yeswana, “Muzwale Branham, Na hani si ka piliswa luli”? Kikuli muka nanula lizoho la mina kuli, “Ni lapelele”? Mulimu aku fuyole, wena. Zeo ki zende. Zeo . . . Mulimu aku fuyole. “Ha ni si ka piliswa.”

114 Cwale, mina baba nanuzi mazoho a mina, ni mina ba ba si ka nanula, “Kono, Muzwale Branham, kaniti Ni bata kupiliswa. Ki pilu yaka. Ni lumela kuli hakuna ze siyezi ku mutu mwa lifasi.” Ki likamañi hape, kiñi zemukona ku amuhela, zekoma kufita puluso ya mina? “Ni lapelele kwateni. Ni bata kupiliswa.” Kana muka nanula mazoho a mina, mwa muyaho kaufela, kai ni kai, “Ni bata . . .”?

115 Ki babakai ba mina baba si ka amuhela kale Moya o Kenile, muli, “Na ziba kuli Ni lukela ku U amuhela”? Munanule mazoho a mina. “Na hani si ka amuhela kale; Ni bata ku u amuhela.” Ku lukile, kuna ni babalikani nyana baba si ka u amuhela kale.

116 Cwale, Kreste ubuluka Linzwi la Hae, mi muna ni kubuluka tumelo ya mina ku Yena. Ki yena Linzwi. Cwale, Maheberu kauhanyo yabu 4, ibulezi kuli, “Linzwi la Mulimu,” ili yena Kreste. Kreste ki yena Linzwi. Mina kaufela mina muziba cwalo? Muli, “Amen.” [Kopano ili, “Amen.”—Mu.] Ki yena Linzwi, “ya swana maabani, kacenu, ni kuyakuile.” Sa Na li sona ku Mushe, Na li sona hape ku Elia; sa Na lisona ku Elia, Na li sona ku Joani; sa Na li sona ku Joani, Na si felelize ku Yena kasibili ku—ku Jesu. Mi kacene Wa swana sina mwa Na bezi nako yani, mi Isali Linzwi la Mulimu le li polofitezwi lizazi la kacenu, le li Mu eza kuba Liseli le li monyeha ni kupaka Linzwi la sepiso.

117 Lu kwa nako ya maungulo, balikani. Jesu u teni. Ni ziba kuli mu utwile zeo.

118 Kucwani haiba mwa li kuba mubone fateni, mwa bupilo bwa mina, mi mwa li kuba mube fateni ni meto, hakuna neba alimuñwi yakile abona fateni, kono nako ni nako fa ni fa mu utwile mufutumala o cwalo? Mi Na ni bile ni meto, Ne ni ka bona, mi Ni mi bulelela kuli kuna ni lizazi. Mu li, “Ha ni zibi mo si ezahalela, kono Ni na ni maikuto, inge a futumala, wakona ku utwa ka kuswala.”

Ni li, “Lani ki lizazi.”

“Lizazi ki sikamañi?”

“Ki liseli.”

“Liseli ki sikamañi?” Kaufela zeo likona kuba lifasi lelinca ku wena.

119 Kono kucwani hane Ni ka mi bulelela kuli Jesu Kreste u yemi mo cwale? Kucwani ha ne Ni mi bulelela kuli U mwahala luna? Na sepisize cwalo. “Kaufela ko ku kopanezi bababeli kamba babalalu mwa Libizo la Ka, Ni mwateni mwahala bona. Ni

mwateni Nina!” Cwale yeo ikaba yana Niti, ku na, Ye kona Niti kaufela, kamba ha Ki Niti ni hanyinyani. Ye ikana yaba ye Lukile, kamba ha i si ka luka.

¹²⁰ Cwale, kuya ka ku mi pulusa, U ezize cwalo ha Na shwile fa Kalvari. Ku mi folisa, U ezize cwalo nako Ya shwa fa Kalvari. Mu lumele cwalo. Linzwi li bulezi kuli U mi pilisize.

¹²¹ Cwale nto fela ya Na ka eza, haiba Na ka yema fa ni—ni suti ye inza tinile, yona ya Na ni file, ne li ka mi bonisa fela kuli ki Yena Mesia.

¹²² Isiñi ka mañiba a limapo mwa lizoho la Hae. Muipi kaufela wakona kueza cwalo, kuipeya mañiba a limapo, ni mali kwa sifateho sa hae, ni litombo ni lika zeñwi. Zeo za kona kuezahala. Zeo libile teñi. Batu babañata mane neba ku kokotelwa sina Yena. Zeo ha ki zona.

¹²³ Kono Bupilo bwa Hae, bone buli ku Yena! “Mwana hakuna sa kona kueza, ka yena Anosi, kono konji Sa bona Ndate a si eza.” Ki Bupilo bo buli ku Yena, bone bu paka cwalo. Isiñi kakuli Na li Mujuda inge musali yani fa siliba ha na Mu lumela kuba Mesia; kakuli Na konile kulemuha milelo mwa pilu ya hae, yene Mu ezize kuba Mesia. Haiba yani neli nzila yana Itibahaza ka yona Mesia mwa mazazi afelile, yani neli nzila ya Hae ye lukisizwe kuli a Itibahaze ka yoina. Yani kona nzila ya Hae ye lukisizwe, kuya ka Mañolo, kwa lusika loo. Kana mwa lumela cwalo?

¹²⁴ Cwale, mañi ni mañi wa mina mo, Na ni muenyi. Ni talimile kwa ni kwa, Ha ni boni mutu ye Ni ziba. Mañi ni mañi mo, ya sa ni zibi, mi ki ya ziba kuli hakuna ze Ni ziba ka wena, nanula lizoho la hao. Kiniti, kai ni kai. Mutu ya lobezi fa yo fa mumbeta, u nanuzi lizoho la hae. Ha ni zibi. Hakuna ya ni ziba.

¹²⁵ Kono muhupule, Mulimu wa mi ziba. Mulimu wa mi ziba. Cwale, haiba U paka kuli Uteni mo.

“Ki sikamañi seo, Muzwale Branham?” Ki mpo.

¹²⁶ Mpo ki sikamañi? Mpo ki sikamañi, nihakuli cwalo? Ha ki kunga sika ni ku itusisa sesiñwi, kubulela kuli, “Nina ni mpo ya kufolisa! Ni ya kwande ni yo folisa *yo*, ni folisa *yani*.” Haiba ne Ni ka kona, Ne ni ka eza cwalo luli. Cwale, kono, ki mpo, mi muna—muna. . . Mu tolokela mpo musili. Mpo ki kuli “uzwa mwa nzila mi ulumeleza Moya o Kenile ku itusisa wena.” Mwabona? Yeo kwateni kona mpo.

¹²⁷ Kona seo mukutazi ali sona. Ha kutazi sa bata ku kutaza. U ka zwa fela mwa nzila, yeo kona mpo, mi susumezo ya taha, mi u—u bulela ka susumezo ya Moya o Kenile. Mpo ifi kaufela ki nto yeswana. Cwale, limpo za bulumiwa, ni zeñwi cwalo, libile teñi. Kuna ni, pili, ka limpo ze filwe ki Mulimu, kikuli, “bapili ki baapositola, bapolofita, baluti, balisana, ni babuleli.” Zani kona liofisi. Zeo ki limpo za luna.

128 Cwale, Jesu Kreste na sepisize kuli Uka eza zeo mwa mazazi a maungulo. Haiba A li eza, haiba Uka sepisa sani mi ni ku si eza, ki babakai baba ka lumela ni ku Mu amuhela, busihu bwa kacenu? Nanula lizoho la hao, uli, “Ni ka Mu amuhela.” Ki babakai mwahali mo kanti. . . Ni itumezi. Ki babakai mwahali mo babasikaba kale ku iliñwi ya mikopano, munanule mazoho a mina. Mawi, mane ki buñata bwa sicaba. Ki babakai baba lumela, A si ka eza kale cwalo, mwa lumela ni hakuli cwalo? Mulimu ami fuyole.

129 Cwale mutalime. Haiba Ni mi bulelezi Niti, Mulimu u tamehile ku ni alaba. Uka eza cwalo. U beya Manzwi a Hae mwa mulomo wa hao mi kipeto A iponahaza ka kubateni. Yeo ki niti, Ki Manzwi a Hae, Ana ni kueza cwalo. “Ni lumile Linzwi la Ka, Halina ku kuta mukungulu.”

130 Cwale, haiba Ni kona kufolisa, Ne ni ka eza cwalo. Kuswana fela sina mutompehi, nyandi, Muzwale Upshaw ye ne lubulela. Muuna muhulu yani yainzi kwa mulaho kwani mwa sipula sa mawili, muuna muhulu wa ndwalume, Ne ni ka mu folisa haiba Ni kona. Ne ni kala kuzwa fa katala, kaniti, mi Na sikuluha ni ku mubona mwa pono, inza zaya, inza zamaya. Na mubiza, na mu bulelela taba yateni, mi neli ona cwalo. A nanuha mi a kala kuzamaya, ataha kwa katala, aswala minwana ya hae ya mahutu, kasamulaho wa kuba sihole fa myaha ye sikisite-sikisi. Mwabona?

131 Busihu bo buswana, kalibe yomunsu, ni mbututu wa hae, ona fani bukaufi ni yena. Se nili, “Ni bona do—do dokota ya tinile magilasi, mi—mi u pazuzwi nyana, ki musizana younsu, mi li mu batisize kufita fa mumizo.”

132 Ki musali muhulu yomunsu, nemusike mwa muswala katala. Ki hali, “Mulena, makeke, yani ki mbututu waka!” Mi ki yo ataha, sikwata sa balibeleli ba fa munyako ne si palezwi ku mu swala.

133 Se nili, “Tate, hakuna kuba ni tuso kuli mutahe fahalimu faa. Yeo ha ki. . . Yoo ki Mulimu.” Se nili, “Hakuna kuba bunde fa kutaha kwanu. Lumela fela.” Mi sa kubama ka mañwele ni ku kala kulapela. Na talima mwa sicaba mi Na bona inge ka nzila, cwalo, kaka telele. Na bona musizana yomunyinyani yomunsu ni sipupe mwa mazoho a hae, inza zamaya mwahala lipula cwalo. Mi Na talima musizana nyana yomunsu yani, na talima kwa mulaho, mi neli yena yaswana. Na li, “I alabilwe.” Ki yo ananuha, mi azwa fa kambeta. Mwabona?

134 Ki Mulimu. Mwabona? Ki Mulimu. Mwabona? Ha koni. . . Hakuna yakona kufolisa. Ki tumelo ya hao ku Mulimu.

135 Cwale, Bibebe ibulezi, kuli, “Ki yena Muprisita Yomotuna, ona fa cwale, ya kona ku swaliwa ka maikuto a matuku a luna.” Kana mwa lumela cwalo? Ki Muprisita Yomotuna! Cwale, haiba ki Yena Muprisita Yomotuna, na Uka eza cwani? Haiba ki Ya

swana maabani, kacenu, ni kuyakuile, Uka eza zeswana sina maabani, kacenu, ni kuyakuile.

¹³⁶ Cwale mu lapele, mi mutuhele Moya o Kenile he . . . Mubulele Mulimu kuli, “Mulimu, muuna yo ya yemi fani ha ni zibi, kono Sa bulela si utwahala kuba niti. Wena uya swana. Ki wena Kreste. Na na kula. Ni tokwile. Mi haiba U ni lumeleza kuba . . . Haiba ha Nina tumelo ya kueza cwalo, kipeto mutu yo Ni ziba abe ni tumelo, ni kulumeleza kuli . . . U bize ni kutuhela—kutuhela—kutuhela na kamba mutu ya sweli mungundo wa Sapalo sa Hao mwa Kanya. Mi haiba muuna yani uzwile mwa nzila, konakuli U itusise mulomo wa hae kuli ubulele hape, ni kueza fela ka nzila yeswana sina mo No ezelize ha No li mwa lifasi. Ni ka ziba kuli U yaswana maabani, kacenu, ni kuyakuile.”

Halu inamiseñi litoho zaluna cwale.

¹³⁷ Mulena Jesu, kuzwa kwa kuhasanya evangeli kutaha kwa musebezi wa bupolofita, kono niteñi Na Ku lumela, Mulena, U sepisize cwalo. Mi Ni lapela kuli U li pete, busihu boo. Lumeleza cwalo. Uni utwe. Sicaba se ha si ta zwa mo, busihu cwana, mi lu ye kwa mahae, lu bulele sina bani bene bazwa kwa Emausi, “Kikuli lipilu za luna ne li sa cisi mwahali ku luna ha Na sweli kubulela ni luna mwa nzila?” Jesu ha na zuhile kwa bafu; ne ba si ka ziba cwalo. Ne ba sweli kuambola ni Yena; ne ba si ka ziba. Kono ha Na ba kenyize mwa ndu, ni kukwala sikwalo, mi ki Ha eza nto yeñwi ya Na ezize a si ka takiswa kale. Sani sa kwalula meto a bona. Ba bona kuli neli Yena. Hape, Mulena, lipilu zaluna ha li cise halunze luya kwa mahae busihu boo, sina zabona mo ne li ciselize. Kakuli lu ziba kuli U bulezi ku luna mwa nzila. Eza lika, busihu bo, zo No ezize ha No li mwa lifasi, kakuli Wena uya swana maabani, kacenu, ni kuyakuile. Lu kupa ka Libizo la Jesu. Amen.

¹³⁸ Cwale mube mwa tapelo mi mulumele fela. Ha lu keniseñi sibaka se, pili. Hakuna taba kamba muinzi kai, mwa muyaho, mulumele Mulimu. Ni lakaza kuli mañi ni mañi abe ka likute luli mi aine akuzize, mulapele.

¹³⁹ Se ha si konahali luli. Ne ni sweli kuambola kakusasana cwana, kwa mukushuko wa bakutazi, “sa buipiteli.” Sa *buipiteli* ki sika se si ipitezi, “Sesiñwi se si ipitezi, kono ibo ki sa niti.” Mwa ziba kuli Moya o Kenile wakona kuyema fa ni kubulela nto yeñwi mwahala sicaba sani, kwa sicaba se Ni sa zibi, seo sikona kuba se si ipitezi. Ki sika se si sa konwi kutaluswa. Ha ni zibi kuli Uka eza cwalo. Ni sepa fela kuli U ka eza, ni sepile kuli U ka eza.

¹⁴⁰ Cwale mulapele fela, mi muli, “Mulena Jesu, Ni bata kuswala sapalo sa Hao, mi Ni—Ni na ni zenitokwa. Na Ku sepisa, Mulena, Nika—Nika Ku sebeleza mwa bupilo bwaka kaufela.” Mulimu ubata kuli u bake. Haiba ha u si ka baka; bake, uli, “Ni bata ku

baka, Mulena. Ni bata kuli U ni folise. Ni bata kuli U ni fuyole. Ni folise cwale Mulena. Ni mutanga Hao.”

¹⁴¹ Ne ni ya . . . Kana no file makadi a litapelo kacenu? Ne ni ka buza fela Billy haiba . . . Haiba ha ezi cwalo, Ne ni ka biza mukoloko wa ku lapelela. Kono neba sikafa makadi a litapelo kacenu. Muine fela ka likute, mulumele.

¹⁴² Cwale, ka Libizo la Jesu Kreste, Ni beya moya kaufela oli mwahali mo kuba mwa zamaiso yaka, kwa kanya ya Mulimu, kuli Linzwi la Hae li zibahale, kuli ka Lizazi la Katulo haluna ku yo ba ni buinyazo.

¹⁴³ Cwale mutalime neku le, mi mulumele cwale. Mulapele ka lipilu za mina kaufela, mi mulapele fela, ni ku ikokobeza. Musike mwa Li lwanisa. Muikatuluse fela ili mina, ni kubulela kuli, “Mulena, No file sepisio. Na Ku lumela.” Sani kona se Ni lukela kueza.

¹⁴⁴ Ni ziba kuli hakuna tuso yakuli ni mi buze. Ki babakai baba boni fateni Liseli lani? Ha lu boneñi. Mu boni siswaniso sa Teni. Ha lu boneñi mazoho a mina, babakile ba bona fateni siswaniso Seo. Kana ha mu Si boni fani? Mwabona, ki sibaka sesiñwi. Si fahalimwa kalibe yani.

¹⁴⁵ U katazaha ka butata bwa mahutu ni mukokoto. Yena . . . Kana u lumela kuli Mulimu wakona ku kufolisa, kezeli? U sweli sikamañi? Ha u ni zibi, kono u sweli Sika. Haiba Mulena Jesu uka ni bulelela yo uli yena, kana zeo li ka kutusa kulumela hande? Ki wena musala Bo. Phillips. Haiba yeo ki niti, yema ka mautu. Ku lukile. Kana Ni muenyi luli ku mina? Nanula lizoho la hao haiba ki niti. Nali kuba ni mubone fateni mwa bupilo bwaka. Ki sikamañi sa sweli? Zamaya u ambole ni musali yoo, kasamulaho. Kuopa kaufela ku felile cwale. U i ketile. Wa kona kuya kwa ndu ube hande.

¹⁴⁶ Ki yo fa kalibe, ona kwa mulaho wa hae kwani. U katazwa ki kuikalelwa hahulu ka za bupilo. O Mulimu, haiba ha ezi cwalo. . . Libizo la hae ki yena musala Bo. Star. Lumela, Jesu Kreste uka ku folisa. Yema ka mahutu mi u amuhele foliso ya hao. Haiba Ni muenyi ku wena, nyanganyisa mazoho a hao. Kuikalelwa kwa hao ku felile. Jesu Kreste u ku folisize.

¹⁴⁷ Ki sikamañi sa Na sepisize? Na li sepisize. Kana mwa lumela?

¹⁴⁸ Kuna ni kalibe mwa mulaho wa hae, ya inzi fani. U sweli kulapela. U ikalezwi, una ni matata. U bata kutuhela kuzuba. Libizo la hae ki musala Bo. Bordon. Yema, musala Bo. Bordon. Makwai a hao a felile. Jesu Kreste wa ku folisa. Na li kuba nibone musali yo mwa bupilo bwaka.

¹⁴⁹ Na wa lumela? Cwale u ziba kuli ha Ni koni kueza cwalo. Yoo ki Jesu Kreste. Ki sikamañi sani? “Linzwi ki le li buhali, lina ni mata hahulu, kufita mukwale o lozizwe kafa ni kafa, li lemuha

milelo ni maikuto a mwa pilu.” Ki Linzwi, Jesu Kreste wa swana maabani, kacenu, ni kuyakuile. Kana ha u lumeli cwalo?

¹⁵⁰ Fa, kiyo muuna ya inzi fa, ni butata bwa mutuba, butata bwa pilu. Yeo ki niti. Ha ni muzibi muuna yoo. Nali kuba ni mubone. Kono ki mukutazi. Revurende, Bo. Kinsey. Yeo ki niti. Kana wa lumela, sha? Yema ka mahutu mi u amuhele foliso ya hao. Jesu Kreste wa ku folisa.

¹⁵¹ Ni bulele cwana, kikuli mu ka ni eza ka sishemo, kuba mukutazi? Beya mazoho a hao ku musala hao, ukatazwa ki butata bwa lipiyo, una ni butata bwa sibiti, ni bukima, ni matata tata. Mu beye mazoho. Li ka mu siya, haiba u lumela.

¹⁵² Nili, kuna ni muuna yainzi kwa mulaho wa hao, u apesizwe ki muluti wa lifu. Una ni kansa. Muuna yo ukula sitombo sa tumor, kansa, kuikalelwa. Libizo la hae ki Bo. Young. Lumela cwale. Jesu Kreste wa ku folisa. Kana u lumela cwalo? Kikuli wa li amuhela? Ku lukile, sha.

¹⁵³ Fa kulobezi muuna, ya lobezi fa kambeta ka. Muñaka, Ha ni ku zibi. Haiba Ni kona ku kufolisa, Ne ni ka eza cwalo. Na ni muenyi ku wena. U tile kuzwa kwahule koo kaufela. U ikatalize kutaha kwanu. Ha ukoni kupata se si fosahalile ku wena; kono ha Ni koni kuku folisa. Utile kwanu ni mufumahali wa hao. Ki yena yainzi fani ni koti ya mubala wa bufubelu nyana. Yeo ki niti. Ku lukile. Muuna yo u apesizwe ki muluti wa lifu; hakoni kupila konji ka nako nyana fela cwale. Una ni kansa.

¹⁵⁴ Wa kula, ni wena, kezeli. U lumela kuli Mulimu wakona ku ni bulelela zo kula? Ki butata bwa mukokoto wa hao. Yeo ki niti. Haiba yeo ki niti, nanuha. Ku lukile, u amuhele foliso ya hao. Lumela cwalo. Beya lizoho la hao ku muuna hao.

¹⁵⁵ Kana wa ni lumela kuba mupolofita wa Hae, sha? Haiba u lobala foo, una ni kushwa luli. Haukoni kupila. Ku felile. Baalafi ba ku palezwi. Kansa i ku cile. Ni boni litaba zetuna kufita zeo ku foliswa. Hanikoni kuku folisa. Kono haiba u ka li amuhela fela ni ku li lumela! Kikuli wa lumela sha? Kona fela kolo yo nani. Linako za hao za mafelelezo za fela. Kikuli u lumela cwalo? Haiba wa lumela, yena fa bulobalo foo. Nanuha fateni foo, ka Libizo la Jesu Kreste! Yema ka mahutu mi ube hande, ni kuzwela fande, unzo lumba Mulimu. Yomuñwi amu swale kwa lizoho foo, amu tuse. Ki yani fani, uyemi ka mahutu.

¹⁵⁶ Ki babakai mwahali mo baba lumela? Munanule mazoho a mina. Amuyeme cwale kifo. Mina baba bata kufoliswa kaufela, amu yeme, ka Libizo la Jesu Kreste. Amu nanule mazoho a mina, kulumbwe Mulimu. Mu Mufe milumbeko ni kanya. Cwale itumele ku Mulena ka foliso ya hao, Jesu Kreste wa swana maabani, kacenu, ni kuyakuile!

¹⁵⁷ Muzwale, madokota ba palezwi. Ye kona nzila ya lukisize Mulimu. Ulumele cwalo!

¹⁵⁸ Ki babakai baba bata ku amuhela nzila ye lukisize ya Mulimu? Amu nanule mazoho a mina ni kufa Mulimu milumbeko, mañi ni mañi wa mina, ni kulumela kuli u folisizwe, ka Libizo la Jesu Kreste. Amen.



NZILA YALUKISIZE MULIMU YA LIZAZI LEE LOZ64-0206E
(God's Provided Way For This Day)

Liñusa le ka Muzwale William Marrion Branham, neli kotalizwe lwa pili mwa Sikuwa la Bune manzibwana, Yowa 6, 1964, ili fa Kern County Fairgrounds mwa Bakersfield, California, U.S.A., iingilwe kuzwa fa tepu ya magesi ya manzwi ni ku hatsiwa kusina kuzusa sika mwa teni kuya Sikuwa. Toloko ye ya mwa Silozi nei hatsizwe ni ku hasanyiwa kiba Voice Of God Recordings.

LOZI

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buńata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org